

Regenza metta accents en ses program guvernamental

■ (mc) Il program guvernamental ed il plan da finanzas servan a la planisaziun strategica da la regenza. Ils accents dal program guvernamental vegnan mintgamai concretisads en in program annual. En il decurs da 2014 vul la regenza elavurar la basa legala per las 11 regions novas, il messadi duai vegnir preschentà al cussegl grond en la sessiun d'avrigl. Ils projects da fusiun vegnan promovids vinavant, la promoziun futura sto dentant vegnir adattada a la nova gulivaziun da finanzas.

Communicaziun ed integraziun

En l'avvegnir vegn la regenza a far dapli adiever dals meds da communicaziun multimedials ed interactivs per megliorar la trasparenza ed augmentar la vischinanza tar il burgais.

L'integraziun duai vegnir promovida vinavant cun metter a disposiziun mesiras correspudentas sin ils secturs da la lingua, da la furmaziun e da l'integraziun sociala e professiunala da persunas estras che vivan legalmain en noss chantun.

En il decurs da 2014 vul la regenza suttametter al cussegl grond la construcziun d'ina nova praschun Realta Nuovo ed uschia sa posiziunar ferm en l'execuziun da chastis penals en la regiun da la Svizra orientala.

Sin il sectur dal sport sto il chantun s'adattar a la legislaziun federala e crear pussaivladads supplementaras per promover il sport en il chantun Grischun.

Sectur social e sanadad

Il messadi per remplazzar las contribuziuns per la realisaziun da letgs en chasas da tgira entras contribuziuns independentas da la furma d'abitar è gia deliberà da la regenza. Cun questa adattaziun vul la regenza promover in provediment da

sanadad integral da buna qualidad ed economicamain supportabel. Ina ulteriura mesira è la sensibilisaziun da la populaziun attempada per sanadad e vegliadetgna.

Adattaziuns èn era previdas per il sectur da l'agid social, da las contribuziuns da maternitad, pajaments anticipads d'aliments e quità dals uffants cumplementarmain a la famiglia.

Traffic public e planisaziun

Sin il sectur dal traffic public èsi da dar tutta atenziun da mantegnair la sostanza da l'infrastructura da viafier. En connex cun l'extensiu da la purschida da las Viafiers federalas duain era las purschidas da la Viafier retica e dals bus postals en il traffic regional vegnir meglioradas. En medem mument ston las vias cantunalas vegnir mantegnidas e la regenza vegn a s'engaschar per in segund

tunnel stradal al Gottard per distgargar il San Bernardino.

Sin il sectur da la planisaziun vul la regenza reveder il plan directiv ed il concept spazial e preschentar in emprim sboz per il svilup dals abitadis.

En preparaziun è ina nova reglamentaziun per il transport da rument. Empe d'ina egualisaziun dals custs da transport vul ins promover il transport cun la viafier.

Svilup integral da l'economia

A moda interpartamentala vul la regenza preparar ina strategia integrala per la promoziun da l'economia. Per savair promover il svilup economic saja indispensabel da metter a disposiziun il terren necessari per industria e mastergn e promover novas interpresas innovativas.

Sin il sectur d'energia vul la regenza rinforzar las mesiras energeticas cun re-

ducir e substituir las energias fossilas e meglierar l'efficienza da l'energia en ils bajetgs.

Da meglierar vinavant èn era las cundiziuns per la produziun da laina. Per quest intent duain er ils reviers forestals ed ils manaschis forestals vegnir organisads da nov en il rom d'ina nova lescha forestala.

Gulivaziun da finanzas

Sche tut va sco planisà ed il pievel accepta la nova gulivaziun da finanzas duai quella entrar en vigor cun l'entschatta 2015.

La regenza vegn plinavant a sa stentar da mantegnair la cumpetitivitad dal Grischun sco lieu economic era cun adattar las impostas da chapital per las persunas giuridicas cun in chapital da maximal dus milliuns francs. L'influenza da questa mesira sin il tegnaichasa chantunal sto dentant anc vegnir examinada da rudent.



En il program guvernamental metta la regenza ils accents da sia politica. FOTO O. ITEM